

COMUNANZA

Carnascèr: lèrga, lèrga che son pien de... legrezza!

Fora per i paijes de Fascia l'è stat endrezà endodanef desvalives momenc de festa con mascherèdes, defilèdes, garejèdes en mèscra, comedies e en mèrtesc da sera l'è stat brujà Carnascèr

L Gran Carnascèr a Ciampedel



Carnascèr a Ciampedel con la Gran Mèscres, l Bezuch e l Paiazo, i comedians en defilèda, l struz e na cobia en mèscra.

Chest an i volontadives à segur lascià lurèr la fantasia e l maturlech: i à tout ca a na vida gustegola mestieres da zacan e d'aldidanché, no se desmentian de trinzenèr vèlch persona de paisc.

Sun paladina, apede al prejentador Giuseppe Lazzar, l Laché, con sie ciapel particulèr forn su da fiores de papier e lèngia vetes da color. Apede a el i cater Marascons, che a Ciampedel da tradizion no pel esser più che doi cobies e che a desferenza di etres paijes, fèsc demò sauc singoi. L Bufon, con sie guant

checen, l barel co la pezes da sen e la facera con su na gnignola e n pavel rosol, à contà chiò e lo patofies per talian e per ladin. A el, ge vel pa ge fèr i compliment per sia braura, dalajà che se pel fèr grignèr ence senza tropes dopies sensc... Dapò bensegur compagnea l prum grop l Paiazo, la tipica mèscra de Ciampedel, l Bezuch e l orghin de Stefano Lazzar.

La defilèda, viventèda da gropes de amic e sociazions de paisc, à tout ite trei cères e sacotenc comedians.

Averjea dut cant i fauresc che con sie èrc proèa a concèr la soles di ciuzè, no se sà te che vida. Ruèa dapò i 'Spions fassegn da mont e da mèr', fotografes da zacan che con n dagherotip e doi teiles da sfon vindèdo tolea ju la jent te n bel retrat de grop. Vegnia do l Salone Gabrele sponsorisà da Forst 'avert domenia 19 da les 14:30 fin che l'è jent!': i ge sporjea a la jent n nef tai de ciavai o l mudament del color con na tentura spray, per nia – sessaben! Daveder se Gabriele chisc dis che vegn arà vèlch neva rezenjon, bela

o burta che sie, su TripAdvisor... N grop de picoi fotografes à endrezà n selfie point con paruches, vegères e autra massaria da se trèr ite. L era ence n grop de scooles con ciapie e faceres de papier vidé da sia maestres regolèdes da chèrtes. La 'Termes Ciampedel' à serà su la defilèda, coi 'Bagnes de fen', olache la jent vegnia empienida apontin de fegn, e la 'Sauna Col da Fae', che sprizèa fora da n picol ciamin fum, e soraldut pien de chel polver da estintor che no se pòdea nience trèr l fia! Ence anter l publich l era tropa jent

regolèda con paruches, bafi e vegères cerc e cognon amò ve portèr dant na cobia, doi persones montèdes vigniuna su n struz con n bech spiz: l'è la demostrazion che da Carnascèr se pel grignèr e fèr grignèr dassen con pech e nia.

La di de festa la è jita inant co la musega de la Spritzband e con de bona magnadiva da meter sot la petenaes endrezèda dal Comitad evenc de Ciampedel che à coordinà duta la manifestazion, dessema coi Alps de Cianacei.

NR

Cères e matitèdes a Vich



Carnascèr a Vich con l schiap de picoi Bufons, i jogolieres de Circensem, l cèr di egizien e Righi l gaert Giulio Cesare sun sia biga tirèda dai ciavai.

En mèrtesc de Carnascèr Vich se à endodanef viventà con la defilèda di cères. Na festa e na legrezza che l era n trat che no se vedea più, per via de la pandemia ma ence de grazia al bel tempram. Anter na fola de jent, n muie en mèscra, se à fat lèrga dantfora n bel schiap de picoi e gregn bufons con si ciapie da fiores

de egne color e sia facera dal nès lonch da la goccia, subito vindò 'l gran circo de Circensem' con jogolieres, chi dai trampoi e perscin la 'femena te cianon' che spetèa de vegnir sbarèda fora, vegnia dapò l gran cèr di conscric del 2005 da Vich che, a la dir duta, i taca ben bonora a fèr i conscric...

L è ciutà fora dapò con sia flemma e sia gran prezijion i fotografes, che tatarèa su sie sogec e do aer traficà n bel pez sot la teila neigra i tirèa fora l retrat, chel giust se sà ben... ence l ombolt de Sèn Jan i à immortalà e l è vegnù fora n bel 'Silvio B.' Direti ca dal Egit l è ruà i egizien con sia piramides e n gaert Giulio

Cesare sun sia biga tirèda dai ciavai che ge corea do e tedant al 'sultano sot n camion'...

Tinultima lèrga al bon magnèr, bon per modo de dir... con cinch restoranc de Vich e Poza che à tout pèrt a Master Chef e n à fat de cotes e de cruves. I cères do aer passà fora Vich doi outes se à logà ju te piaz

Massar olache l'è stat fat la premiazion e la volontadives aea enjgnà da magnèr e da beiver. La festa è jita inant n bon pez con musega e legrezza te egne piz e cianton de gra al Comitad Manifestazions e al lurier de duc i volontadives che se à metù a la leta per vivènter l mèrtesc de Carnascèr.

MC

Comedianc feruscoi a Soraga



Carnascèr a Soraga con la Mèscres tradizionèles, i comedianc che à portà dant na gustegola comedia e l gran fech te Pra del Preve che à brujà Carnascèr.

La tradizion del Carnascèr fascian è stata renovèda con gran gaissa ence a Soraga. I joegn del Grop de Folclor à metù ensema na gustegola comedia e ensema a Bufon, Laché e Marascons è jà peè via entorn les sie da sera a jir fora per i hotie a ge portèr legrezza, spas e tradizion ai ghesè de paisc.

Da sera na fola de jent li spetèa te Pra del Preve olache l era stat enjgnà ence zeche da magnèr e da beiver. Anunziè dal rit del Laché e i sauc del Bufon e i Marascons, i comedianc se à prejentà apede Calonia, duc chenc con la facera de legn i se à fat lèrga anter l publich: l preve, la monia, l servidor che jia a tor su

bonamans, la femenes 'pies' e dapò na bela 'friza' che nience da se n fèr marceva à fat sbugolèr i eies de duc chenc... e vindò l ombolt, i dotores, l conscrit. Vegnia pa fora che l è stat n cal demografich a Soraga, con gran spaent del ombolt, e no i pòdea fèr nia de auter che maridèr via la tousa e l conscrit. L se à prejentà

coi fiores ma l era massa pech, con na corda de fighi, ma amò nia, fin canche l à tirà fora n scialam, ma gran vé, e la tousa e sia familia à azetà, i è stac benedii e l è stat gran festa, amor e fortuna e subito n picol te cuna. Complimenc al Grop de Folclor, ai comedianc, n muie bravi, che zenza

proferir parola i à fat dalbon comedia e i à fat goder duc chenc. Sobito do i à brujà la gran assa de cassetes e legna che i aea enjgnà su te Pra del Preve e la mèscres vida è sutèdes dintornvia. Carnascèr è stat festejèda e brujà, l fech se à portà demez ac, bugoi e legrezza per ge lascèr lèrga al temp de Careisema.

MC